






Will James.

Nov 3. 1713.

---




366  
3/18

Handwritten text, possibly a signature or name, written in dark ink. The text is illegible due to blurring and fading.

A single horizontal line drawn across the page, likely a separator or underline.





Digitized by the Internet Archive  
in 2019 with funding from  
Wellcome Library

[https://archive.org/details/b3053317x\\_0001](https://archive.org/details/b3053317x_0001)



D E

IMPERIO

SOLIS ac LUNÆ

I N

*Corpora Humana,*

E T

Morbis inde oriundis.

A U T H O R E

RICHARDO MEAD, M.D.S.R.S.  
Et in Nosocomio Divi Thomæ Lond. Medico.*Rationalem puto esse debere Medicinam; Instrui verò ab evidentibus Causis, obscuris omnibus non à Cogitatione Artificis, sed ab ipsa Arte rejectis. Cels. in Præf.*

L O N D I N I :

Impensis RAPHAELIS SMITH ad Insigne  
Bibliorum in Porticibus Bursæ Regalis, in  
Vico Cornhill. A. D. MDCCIV.



---

---

# PRÆFATIO.

**C**UM Varium ab omni  
ævo fuerit, pro diversis  
inter se Philosophorum  
Decretis, Medicinæ Studium;  
mirari subiit aliquoties, post  
feliciter jam ante aliquot annos  
promotam Causarum Natura-  
lium Indagationem, non ea ac-  
cessisse Salutari Arti Incre-  
menta, quæ à rectiùs institutâ  
Ratiocinatione sperare fas erat.



*Quantum profecerint in Rerum Cognitione Sapientiæ Consulti, ab adjunctis Disquisitioni de Naturâ Geometricis Ratio- nibus, Authoribus imprimis Galileo, Keplero, Torricel- lio & Neutono, Nemo in his Sacris vel mediocriter versatus ignorat. Et Conjecturis tamen adhuc scatet Medicina, & vix- dum Scientiæ Titulum mere- tur.*

*Id num Artis ipsius Indoli debeatur, quæ certa Principia respuat; an potius Medicis vi-  
tio*

tio vertendum sit, quòd obli-  
 quum Tramitem insistentes, no-  
 luerint tamen, Laboris Tædio,  
 redire in Viam; alias fortassis  
 dabitur Disputandi occasio. In-  
 terim, ut manifestum fiat, quan-  
 tum prosit Medentibus, tum in  
 Causis, tum in Remediis Mor-  
 borum inveniendis, Geometriæ  
 Studium, difficillimam Quæsti-  
 onem, De Quarundam Ægri-  
 tudinum Circuitibus expli-  
 care institui; quæ quidem talis  
 est, ut solâ hujus Disciplinæ  
 ope investigari queat.



Coactus idcirco sum in hac  
*Disputatione paulo accuratiores*  
*inire Numerorum Rationes,*  
*quàm quas requirere videtur*  
*Res Medica ; non quo præclu-*  
*dam aditum ad Disquisitiones*  
*nostras Iis omnibus qui Geome-*  
*triam non callent, sed ut Illis*  
*satisfiat qui summam in expli-*  
*candâ Rerum Naturâ ἀνεξέλεον*  
*desiderant ; & ne quis fortasse*  
*putet, nos pro Causis Mecha-*  
*nicis fictas Hypotheses, pro*  
*ipsis Naturæ Legibus inania*  
*Commenta venditare.*

*Ne-*



*Negligant tamen per Me licet, qui nullo Mathematicarum Disciplinarum Studio tenentur, hanc Operis nostri partem ; Nullam Ego Calculis Algebraicis gloriolam aucupabor unquam, qui sentio quàm mihi sit ad hasce Animi Exercitationes mediocre nimis Ingenium. Et erunt, ut opinor, in Schedulis his Historiæ aliquot & Monita, quæ etiam Illis qui omnia Ratiocinia in Arte nostrâ despuunt, solam Experimentiam Ducem secuti, Usum ali-*

*aliquem in Medendo præbeant ;  
qui quidem nostri omnis qualif-  
cunque Laboris Finis est.*

*Latè patet iste in quo decur-  
rimus campus, neque uno tan-  
tum modo innumeris, inter quos  
miseri vitam trahimus , Dolo-  
ribus opitulamur ; Tum Expe-  
rimentis, Tum Ratione, con-  
stat Medicina ; & qui huic  
minimè fedit, eo saltem certiori  
spe Salutem promittit Agro-  
tantibus, quo illis instructior ad  
Artem accingitur.*

*At*



*At utrumque sane auxilium desiderat Res Medica, ut quibus supersunt Exempla, hos non deficiat Scientia, quæ illa variis Casibus accommodare docet.*

*Quanquam enim sobriis fortassis & frugi Hominibus, quales fuisse primos Mortales accepimus, adversus infirmæ Valetudinis incommoda, satis fuerit præsidii in perpaucis Remediis, quæ Casus ostenderat, & comprobârat Usus; tamen, successu*

*a* *tem-*

*temporis, postquam Corpora vitârant Desidia & Luxuria, aliâ sæpe atq; aliâ Curatione opus erat; cùm quærere jam necesse esset non tantum quid Morbum fecerat, sed & quænam Ratio communem ipsius Naturam atq; Indolem in hoc aut illo immutârat.*

*Hinc mederi oportere, dixit Hippocrates (a), & communia & propria intuentem; quoniam, ut rectè Celsus (b),*

---

(a) Epidem. lib. i.      (b) In Præf.

Inveniuntur in quibus aliter,  
atque in cæteris, idem eveni-  
niat ; & Causæ quoque æsti-  
matio sæpe Morbum solvit.

*Neque aliâ sane de causâ,  
cessasse per septingentos annos,  
à Trojano, nimirum ad Pello-  
ponnesiacum Bellum, Meden-  
di Studium, memoriæ prodidit  
Plinius (c), quàm quòd cùm  
nova jam non rarò inciderent  
Morborum genera, neq; pares  
huic operi esse poterant qui solo*

---

(c) Lib. 29. in Proœm.



*Ufu Medici evaserant, sibi  
vendicârint Sapientiæ Cultores  
salutarem Professionem, quæ  
sine Naturæ rerum Cognitione  
trunca & debilis deprehende-  
batur.*

*Hinc de eodem illo Inter-  
vallo refert Celsus (d), Habi-  
tam esse Sapientiæ Partem  
Medendi Scientiam, ut &  
Morborum Curatio, & rerum  
Naturæ Contemplatio sub  
iisdem Authoribus nata sit.*

---

(d) Loco citat.

*Et est quidem in rem nostram quàm maximè, hìc indicare, Geometras reverà insignes fuisse illos Philosophos qui prima posuerunt antiquitùs Artis nostræ fundamenta.*

*Excelluit inter omnes Sapientiæ Magistros illis temporibus Pythagoras, qui tantam acquisivit laudem à Medicinæ peritiâ, ut circumferret vulgò fama, Peragrasse Ipsum Civitates non Docendi sed Mendendi*

dendi causa (e). *At eximii simul erant hujus Viri in Mathematicis Disciplinis Progressus. Id testantur Duo imprimis nobilia Ipsius Reperta, alterum de Quadrato lateris in ὀρθογωνίῳ Triangulo recto angulo sub-  
jecti Quadratis laterum eundem continentium æquali; alterum de Area Parabolæ, quam demonstrasse primum ipsum Author est Proclus (f); & ob hoc quidem potius quam*

---

(e) Ælian. Var. Hist. lib. 4. cap. 17. Vide & Diog. Laert. (f) lib. 4. ad primum Euclid.



*illud Inventum, Hecatombam illum immolasse credidit Plutarchus.*

*Audivit Hunc in Italica Scholâ Empedocles, divino ingenio Vir, qui abdita Naturæ Penetralia rimatus, illa præstitit in Arte nostrâ quæ frustra quis ab Empirica Medicina sperâsset.*

Inciderat in Agrigentum, Natalem Urbem, gravis Pestilentia, comperit mox ille causam, & occlusis Montium qua-

quarundam Faucibus per quas  
spirantes infalubres Venti  
importarant Contagionem, a-  
vertit Malum (a).

*Pari beneficio & Selinuntios affecit, quos cum circumalluentis Fluvii Vitio & Pastore invaferat Lues, duos Ille vicinos Amnes in hunc derivari jussit, quo pacto, concitato Flumine & purgato Alveo dulcescebant paulatim*

---

(a) Plutarc. in Lib. περὶ πολυπραγμοσύνης, & in illo contra Colot.

Aquæ, & grassari desiit  
Pestis (b).

*Ideò imprimis memoratu  
dignæ sunt hæ Historiæ, quo-  
niam nullis cedere Remediis  
Contagiosos Morbos, ad iram  
Deorum vulgo relatos, credi-  
dit Antiquitas; in utroque verò  
Casu auxilium indicavit Me-  
chanica Scientia; & à consi-  
milibus, denique causis non ra-  
rò hujusmodi Calamitates in-*

---

(b) Diog. Laert. Lib. 8. Segm. 70.

b

ferri,



*ferri, innumeræ Authorum Observationes fidem faciunt.*

*Præceptorem, ut quidam crediderunt, ipsius Hippocratis, Democritum, Geometriæ pariter ac Medicinæ Studium commendavit. Scripsit Ille De Contactu Circuli & Sphæræ, de Geometricis, de Lineis ratione carentibus, simul & De Natura Hominis, de Humoribus & de Pestibus Libros (a).*

---

(a) Diog. Laert. in Vitâ Democr.

*Per Hos quidem & Horum  
similes Viros increvit hæc Pro-  
fessio ad Hippocratis usque  
tempora. Is cùm Vulgi Su-  
perstitionem, Empiricorum  
Audaciam, & Simulationem  
inanemque Sophistarum Of-  
tentationem, Artis Processi-  
bus maximè obstare deprehende-  
ret ; ad illum finem Scripta sua  
referebat, ut hisce Impedimen-  
tis & Difficultatibus iret obvi-  
am. Et Religionibus quidem  
obsistere docet in aureolo de  
Morbo Sacro Libello ; ubi*

b 2                      multus

*multus est in patefaciendis illorum hominum Fraudibus ac Falaciis, qui Pietatis erga Deos specie & obtentu Inscitiam suam velabant, Incantamentis & Lustrationibus Morbos depellere profitentes, quos Medicamentis non poterant.*

*In Libris de Arte, de Decoro, & de Præceptionibus, tum contra Illos qui Artem esse negantes Medicinam, Experimenta tantum spectabant; tum eos qui perverso more hanc colebant, prolixè & acutè disputat.*

*Et*



*Et animadvertere quidem  
 lubet, quoniam in partes trahi  
 video à quibusdam, invitum li-  
 cet, Divinum Senem, Mecha-  
 nicum ubique Ratiocinandi  
 genus, in hisce Tractatibus à  
 Medicinæ Parente probari &  
 commendari ; Laudo (inquit  
 ille) Ratiocinationem, modo  
 ex iis quæ Sensus compre-  
 hendunt, aut Experimenta  
 ostendunt, nascatur, & rite  
 ex his quæ comparent Con-  
 clusiones colligat. — Quod  
 si non legitima Inductione  
 proce-*

procedat, verum ex Opini-  
onum Commentis proficifca-  
tur, Molestias & Difficulta-  
tes graves affert (a).

*Illustrantur & confirmantur  
hæc ab iis quæ de Prisca Me-  
dicina differens, inculcat Ipse ;  
Postquam enim fimillimos esse  
plerosque Medicos imperito-  
rum Navium Gubernatorum  
pronunciasset, quorum dum  
tranquillo Mari & secundis  
Ventis vehuntur, non depre-*

---

(a) Lib. de Præcept.



henditur Artis Inscitia ; at  
 si forte gravior Cœlum con-  
 traxerit Tempestas, constat  
 mox illorum Culpa factum  
 esse Naufragium ; Cogno-  
 scendas imprimis esse *docet*  
 Rerum Facultates, non fin-  
 gendo aut excogitando, sed  
 Vires quas in Corpus nostrum  
 habent & exercent, invenien-  
 do ; in quo tum Humorum  
 Affectiones, tum Partium Fi-  
 guras perpendere oportet ;  
 quarum nimirum quædam  
 ex ampliore Sinu in angu-  
 stum Apicem coeunt ; quæ-  
 dam

dam expansæ sunt ; aliæ teretes & Cylindræ ; aliæ densæ ; aliæ denique raræ & laxæ.

*Hæc est illa Sapientia quæ cum Studio Medicinæ conjungenda est ; quæque instructus Diis par evadit Artifex (b).*

*Sed ego fusiùs ista non exponam. Ex dictis manifestum est, Σοφιστὴς appellare Artis Ma-*

---

(a) Lib. de Decor.

gistrum Illos qui fictis super Cau-  
 sis argumentantur; At Ἐργῶ Ἰήτρης  
 habere hos qui ex perspectis Na-  
 turæ Legibus & cognitâ Corpo-  
 ris animalis fabricâ ratiocinan-  
 tur. Quod in Illorum gratiam  
 moneo, qui quasi nihil interesset  
 inter commentitias Philosopho-  
 rum ὑποθέσεις & certas Geome-  
 trarum Conclusiones, ita de-  
 spiciunt & coram indoctâ Ple-  
 be irrident utilissimam Disci-  
 plinam.

Næ illi crassâ (ne dicam in-  
 vitâ) Minervâ, tum Philoso-  
 c phiam



phiam tum Medicinam colunt. Longè enim discrepant ab Illorum Opinionibus Horum Rationes. Qui Hypothesin condit, verisimilia sequitur, & iam imprimis agit, ut Eventibus & Phænomenis solvendis pares sint & respondeant Positiones. Contrà, Mechanica Θεωρία Demonstrationibus constat, quas aut ex Corporum Figuris colligit Geometriam edoctus, aut ex cognitissimam & manifestò compertis Motûs Legibus necessariâ Inductione, pertexit.

Exem

*Exemplis Res ista fiet illustrior ; Concinnavit de Corporum Gravitate Suspiciones & Conjecturas Cartesius, nec quicquam inde in Naturæ Rerum cognitione profecit ; at hujus Leges, nullâ habitâ Causæ ratione, Geometricè persecutus Neutonus, ipsam Mundi Fabricam Contemplationi nostræ subjecit. Morborum Soporiferorum Ideam commentus est Willisius, unde discimus super-  
fuisse Authori Verba, defuisse Medendi Scientiam ; Horum*



*verò ipsorum Historiam & Symptomata ad Mechanicas Rationes exigens Bellinius, tum ad Notitiam tum ad Curationem gravium Malorum patefecit Viam. Pluribus supersedeo, neq; enim extorquendum est illorum Hominum Suffragium, qui datâ operâ Assensus suos sustinent, & in ipso Sole Caligant.*

*Et hæc quidem hætenus. Quod ad nostram hanc Opellam attinet, Lectorem Ego Newtoniana aliquantulum doctum desidero, aut qui ea saltem intellexerit*

*tellerit quæ ad Sensum Summi Philosophi de Æstibus Maris in Actis nostris Philosophicis (a) luculenter exposuit Vir omnibus bonis Literis eruditissimus E. Halleius.*

*Cùm meum super hisce Edendis Consilium cum amicissimo A. Pitcarnio, ad Reipublicæ Salutem & Artis Incrementum nato Medico, per Literas communicâssem, laudavit ille Institutum, & pro eâ quâ est Hu-*

---

(a) Num. 226.



manitate, Mihi è Thesauro suo instructissimo Historias de Quorundam Morborum Recursibus, perlibenter suppeditavit. Has, non levia Libelli nostri Ornamenta, idoneis quasque locis exposui, gavisus Viri in hisce Studiis Principis Testimonio Sententiam nostram confirmasse, eo magis quoniam æquum erat alienis potius quàm propriis Observationibus Novæ Theoriæ asserre fidem.

Quod superest, neque id sane de nihilo est, quòd Rerum Conditoris



ditoris Opt. Max. Sapiëntiam  
 illustret nostra Dissertatio, &  
 Ipsius Bonitatem miro artificio  
 junctam patefaciat ; qui cùm  
 omnibus Viventibus summâ Cu-  
 râ prospexerit, hoc Bruta inter  
 & Ratione prædita Animantia  
 fecit Discrimen, ut cùm frue-  
 rentur illa communibus Natu-  
 ræ Beneficiis, Nobis ultrâ licè-  
 ret, Horum Rationes & Usus  
 explorare & Dædalæ Molis di-  
 vinum Opificium contemplari.

Curam deniq;, memoratorum  
 Casuum ideò perstrinxi brevi-  
 ter

*ter, quoniam quæ Mihi in ple-  
risq; Morbis Notatione maximè  
digna in dies occurrunt, illa, si  
neq; animus neq; otia ad Scriben-  
dum defuerint, in Publicum ali-  
quando emittere constitui. Tu,  
interim, Lector, hisce Fruere &  
Vale.*

---

---

*De Imperio SOLIS ac LUNÆ  
in Corpora Humana, &  
Morbis inde Oriundis.*

---

C A P U T I.

**M**Orborum complurium *Accessiones & Circuitus à Lunæ* Viribus pendere, ab omni ævo crediderunt Antiqui. Immò quosdam esse qui soli *Astrorum Influxui* originem suam debeant Testimoniis suis comprobant; Historiarum enim illorum qui populariter grassantur Morborum Ultimi Scriptores toti sunt in enumerandis *Corporum Cœlestium* Motibus & Influentiis. Idcirco *Thessalum* Filium monet *Hippocrates*

B



*pocrates* (a) ut Arithmeticæ & Geometriæ operam det, quoniam *multum possunt in Ægritudinibus Ortus & Occasus siderum* (b).

At verò cùm temporis decursu Philosophorum Decretis accommodari cœpisset Medicina, nec tamen ex his ulli Compagis Animalis cum Astris Consensum explicare aggredierentur, neglectâ paulatim verâ observandi Normâ, non alia Cœlestibus hisce Causis tribuebatur Efficientia, quam quæ à manifestâ Aeris Ambientis Dispositione peti posset; nisi forte excipere velimus quasdam quasi veritatis scintillas quas vanis suis Commentis obscuratas etiamnum jactat Astrologorum vulgus.

Animus itaque est, ut certi aliquid in re perdifficili & recondi-

---

(a) *Epist. ad Theſſalum.* (b) *De Aere, Aquis & Locis.*



tâ constet, ostendere primùm *Solis Lunæque* Cursum præter Mutationes quas Anni tempora & tempestates hinc oriundæ inducunt, pro variis eorum Stationibus variè Corpora nostra afficere, & Fluidorum Motus turbare ; Inquirere deinde, quinam morbi, quæve in morbis Symptomata hinc trahant originem ; & quantum deniq; ad Medicinam rectè faciendam conferant hujusmodi Ratiocinia.

Perpetua est Autorum qui *Historiam Ventorum* conscripserunt Observatio ; Status Cœli maximè *Ventosos* incidere in Æquinoctium Verum aut Autumnale. Notum quinetiam est pacatum alioquin Aera *Ventorum* vi plus minus agitari plerumque Meridie & mediâ Nocte, hoc est, *Sole* ad Meridianum Cœli fastigium, aut subter Cœli ima & Meridiano contraria, accedente.

Idem pariter contingere, cum intumescit maximè Maris Æstus, hoc est, *Lunâ* summum Cœli Verticem aut huic oppositum locum tenente. Servant idcirco hæc Tempora quibus Agricultura aut Res Nautica Curæ est. Novam denique Plenamque *Lunam* Tempestates Cœli commutare coortis Ventis, nemini non compertum est. Evolvat qui de his certior fieri cupit, *De Chales de Arte Navigandi Librum, Gassendi Philosophiam, & J. Goad Astro-Meteorologica.*

Hæc omnia cum rato & perpetuo Naturæ ordine eveniant, mirum est Philosophos nondum illorum Causas accuratiùs explorasse. Quanquam enim verissimum sit variam esse admodum & à diversis pendere Principiis *Ventorum* Originem, at nihilominus constans adeo & certus statûs temporibus horum

Recur-



Recurfus, unam aliquam neceffariò quæ conftanter & eodem modo agat, habet à Naturâ Caufam.

Jamdiu compertum eft, *Aera* Terram noſtram ambientem eſſe Fluidum ſubtile virtute elafticâ præditum, cujus inferiora à ſuperioribus premantur: Vis verò cujuſcunq; Partis undiq; in Orbem æqualiter ſe diffundat. Hinc fit, ut ſi externa quælibet Cauſa Gravitatem hujus Elementi in quovis loco minuât, ea ſimul efficiat ut ruat conſeſtim in eam ſedem ab omni parte circumfuſus *Æther*, uſq; dum reſtituatur in toto Ambiente *Æquilibrium*, quod in omnibus corporibus fluidis locum obtinere neceſſe eſt.

Hujusmodi quivis Impetus *Ventum* faciet, qui nihil eſt aliud niſi concitatio *Aeris* motus verſus certam aliquam Mundi Plagam. Inquiren-



quirendum igitur erit num suppetat universalis quæpiam Causa quæ pressionem Aeris enumeratis modò temporibus immutet, hæc enim quæcunque sit, Ventos & si quæ alia hinc pendent Phænomena, per certa illa Intervalla, recurrere faciet.

*Æstus Maris* reciproci tum miro quo fluunt Ordine, tum insigni quam Animantibus ferunt utilitate, nunquam non invitarunt ad sui Contemplationem illorum ingenia, qui studio Naturæ tenebantur. Ast frustrà tamen tentarunt omnes nobile hoc Divini rerum Conditoris Artificium, usque dum altiùs petita *Principia* & Rebus ipsis consona patefecit Orbi *Newtonus*. Horum demum ope discimus, a conjunctis aut separatis *Solis Lunæque* Viribus, quarum tamen effecta incertæ locorum aliorumque

rúmque Casuum Rationes augment & minuunt, oriri omnes *Æstuum* Varietates. Cúmque memoratæ jam *Aeris* Mutationes iisdem eveniant temoporibus quibus contingunt Maris Fluxus, sintque pariter tum Aquæ Oceani tum ambiens nos *Æther* Corpora fluida iisdem Legibus Motûs magnâ ex parte subjecta, liquet locum hic habere illud summi Philosophi effatum, horum, nimirum, *Effectuum Naturalium ejusdem generis easdem esse Causas* (a).

Quodnam inter hæc discrimen faciat nota illa *Aeris* Virtus quâ caret Aqua; mox dicam; sepositâ tantisper hujus consideratione, hoc constat, sicuti intumescit Mare, sic bis semper vicenis quinisque horis attolli debere ad insignem altitudi-

---

(a) *Newton. Princip. pag. 402.*



*nem* nos ambientem *Aera*, ab attractione *Lunæ* ad meridianum *Coeli* fastigium accedentis, ita ut *pro Sphærali* se in *Sphæroidem*, quam vocant, *Figuram* induat, cujus longissima *Diametros* producta per *Lunam* tranfiret. Eandem pariter necessario sequi *Ætheris* Intumescientiam, quoties *Sol* ad loci cujusvis *Meridianum*, aut supra aut infra *Horizontem*, pervenit. Fieri quinetiam hanc *Maximam* quando *Luna* Nova vel Plena est, a conjunctis nimirum utriusq; *Astri* Viribus; *Minimam* verò quando ea *dimidia* est, quatenus nempe, in contrarias partes trahentibus eo tempore sideribus, sola Virium, quibus alterum alteri præpollet, differentia, effectum pariat. Medio-crem denique eandem fore tempore quod inter dimidios *Lunæ* Orbes & Novam Plenamve *Lunam* medium est.

Præter



Præter hæc, altiùs solito se attollit *Aer* circa duo *Æquinoctia*, quoniam cum *Æquinoctialis* *Linea* illi *Globi Terrestris Circulo* adversa respondeat qui *Diametrum* habet maximam, utrumque *Sidus* dum in illa versatur *Terræ* est *Vicinius*. Præterquam quod *Agitatio Fluidi Sphæroidis* in majori *Orbe* se revolvantis major sit, & *Vis* insuper *Centrifuga*, a diurno *Telluris Motu* orta effectum habeat eò loci longè maximum. Vires acquirant hæ *Causæ* a *Novâ Plenâve* hisce temporibus *Lunâ*, ob dictam modo rationem; continget verò circa dimidios *Sideris orbes* his mensibus minima *Attractio*, quoniam *Luna* tunc temporis ab *Æquatore* maxime declinat. Variæ denique *Lunæ* in *Perigæo* & *Apogæo* *Distantiæ* efficiunt, ut hæ *Mutationes* paulum

C

lùm antecedant *Æquinoctium Ver-*  
*num*, *Autumnale* verò subsequan-

tur. *Omnia* hisce contraria eveniunt  
 necessariò, cùm in *Solstitialibus* *Cir-*  
*culis* hærent duo *Sidera*.

Ult finem tandem faciam, in iis-  
 dem *Parallelis*, ubi *Lunæ* Declina-  
 tio est illum *Coeli* *Polum* versus  
 qui altissimus insurgit, validissima  
 est *Attractio* cùm illa ad ejus loci  
*Meridianum* *Verticem* accedit, mi-  
 nima verò ubi pervenit ad *Meridi-*  
*anum* loci oppositi. Quod contrà  
 contingit in *Parallelis* his adversis.  
 Causa est in *Sphæroide* *Terræ* *Æ-*  
*therisque* *Figurâ*.

Non alio fundamento nititur to-  
 ta hæc *Ratiocinatio* quam *Newtoni*  
*Doctrinâ* de *Æstibus* *Maris* ad *Ac-*  
 rem



rem utcunque accommodatâ. Neque sane difficile erit ex jam dictis intelligere quâ necessitate statis iis temporibus recurrant memorata modo *Ventorum Phænomena*. Proximum itaq; est, ut ostendam, tum quantum attollantur *Oceani Aquæ*, tum quibus de Causis superet harum *Fluxus Lunatica Ætheris Intumescencia*; quo clarius, quanti illa momenti sit ad turbandos *Machinæ Animalis Motus* percipiatur.

Demonstravit *Newtonus* (a) vim *Solis* ad *Mare* movendum eam habere rationem ad *Vim Gravitatis* quam habet 1. ad 12868200. Esto illa,

$$S. : G :: 1. n. \quad \text{Unde } S = \frac{G}{n}.$$

---

(a) *Princip.* Lib. 3. Prop. 36.



Vires pariter Lunæ quibus attollitur Mare esse ad Gravitationem in proportionem 1. ad 2031821. Sit hæc,

$$L. G :: 1. s. \quad \text{Unde } L = \frac{G}{s}.$$

Cúmque Vis Centrifuga Partium Terræ a diurno Motu orta fit ad Vim Gravitatis ut 1. ad 291. Esto hæc,

$$C. G :: 1. e. \quad \text{Unde, } C = \frac{G}{e}.$$

Hinc,

$$S + L. C :: \frac{G}{n} + \frac{G}{s} \cdot \frac{G}{e} :: \frac{1}{n} + \frac{1}{s} \cdot \frac{1}{e} :: 1. \frac{s \cdot n}{s + n \times e} :: 1. 6031.$$

Docuit nos idem Philosophus (a),  
Vim Centrifugam sub Æquatore, A-

(a) Princip. Lib. 3. Prop. 37.

quas attollere ultrà quàm circa *Po-*  
*los* intumescunt, ad pedes 85200.  
 Unde, cum ea Vis quæ est ut 6031  
 Elementum hoc ad ped. 85200, in-  
 tumescere faciat, junctæ Solis Lu-  
 næq; Vires, quæ sunt ut 1, idem  
 ad pedes 14 attollent, nam  $\frac{85200}{6031}$   
 = 14. quàm proximé.

Notum jam est, eo majori Impetu  
 ferri referrique Maris Æstus quo  
 promptius & facilius Virtuti Tra-  
 henti obsequi possunt Aquæ. At  
 verò cum positum sit, rationes in-  
 eunte *Edm. Halleio*, sagacissimo Geo-  
 metrâ (a) *Aeris* Regionem ad 44  
 usq; Milliaria diffundi; Aquarum  
 porro Oceani mediocrem Altitudi-  
 nem, esse dimidii *Milliaris*; Liquet,  
 Spatium a *Sphærâ Aereâ* occupatum

---

(a) *Philos. Transact.* N. 181.



*centenis* circiter *Vicibus Oceani* *Molem*, etiamsi *Globus Terræ* *Aquis* undique operiretur, superare.

Hinc major erit in ampliori Orbe circumacti liquidi *Ætheris* agitatio.

Obstant prætereà accedenti & recedenti *Mari*, *hîc Scopuli*, *illic Vada*, & inæquales *Littorum Sinus*. At surgentem in altum *Aera* nihil reprimat ; Cujus ea porrò est *Tenuitas* & præ *Aquâ* mira *Fluiditas*, ut minimâ *Vi* facillimè quaquaversus impellatur & excurrat.

Hoc nunc restat ut dicam, Eam locum obtinere in *Corporibus* quæ attrahuntur *Legem*, ut *Vires attractionis* sint in *ratione Quadratorum* *Distance* suarum *reciproca* ; unde validius multo erit ob majorem hujus



hujus Elementi viciniam, in *Aera* quàm in *Aquas* Solis Lunæque Imperium.

Majoris verò denique momenti est Virtutis in *Æthere Elasticæ* Consideratio, cujus hæc est Conditiō & Natura, ut ad *Pressionem* quæ ei incumbit *Rationem* habeat *reciprocam*. Hinc, diminuto, quod incumbit, *Pondere*, immane quantum se in altum explicabit subiectus Aer.

Verum quidem est minui hanc paulatim & decrescere, ita ut ultra certum a Terrâ Terminum sit Momenti nullius; At ideò tamen vel levis hujusmodi Mutatio parit hic Effectum maximum, quoniam ab illâ fit, ut velocius Facultatem Trahentem consequatur circumfusa Globo Volubilis Materia.

Ista

Ista quidem omnia & ejusdem generis alia efficiunt, ut ab eâdem *Vi Lunari Ætheri* quàm *Aquis* longè majores *Æstus* inferantur. Neque patitur hujus Instituti ratio ut operosis *Calculis* quantum ad hanc rem conferant Singula, & quo momento agant, accuratiùs exequar. Ad Propositum satis est, cùm Universalem esse, tum certis Intervallis reverti, dictas *Aeræ Regionis* Motiones, ostendisse.

Hæc cùm ita se habeant, facile est, ex *Æstibus Maris*, *Reciprocantis* simul *Ætheris* Impetum Conjecturâ assequi. Videmus ab Intumescentiâ ad quatuordecim Pedes, quantâ *Vi* appellant ad Littora detumescences *Aquæ*; *Turbines* itaq; *Ventorum* concitet necesse est, altiùs longè (ultra *Milliare* forsan) levatus



tus *Aer*, nisi forte præsto sint aliæ quæ his obstant Causæ.

Neq; sane dubitari par est, quin eodem Rerum Opificis Opt. Max. Consilio eveniant hi utriusq; Elementi *Fluxus Refluxusque*, qui Motibus his reciprocis tum *Aquas Oceani* Stagnationis & Corruptionis Vitiis, quibus Animantibus omnibus noxiæ evaderent, immunes præstat ; tum *Fluidi Ætherei* purum & salubrem Statum, sine quo nulla Nobis constare possunt Vitæ Officia, in dies conservat & recreat.

Hujus Artificii Usus experimur quotidie, Modum verò, quod sciam, monstravit hætenus Nemo ; At non aliud tamen magis spectare debebant li, qui in *Apricis & Aper-tis* Locis citissime convalescere *Æ-gritudinibus* confectos, in *Humidis* contra & *Conclusis*, vel Sanissimos  
D facile



facile Morbis corripì, Observabant.

Unicum tantum occurrit quod nostris hisce Ratiociniis opponi fortassis possit Argumentum. Nimirum, si dicta modò Phænomena a memoratis Causis ducerent originem, cùm illæ ejus Naturæ sint quæ *Aeris* pondus imminuant, debere necessario *Novâ* imprimis *Plenâque Lunâ* subsidere in *Barometra Argentum Vivum* ad certum Terminum, quod tamen contrà evenire comperiunt *Ephemeridum Barometricarum* Conditores.

Id ipsum imprimis miratus est *Ramazzinus*, Verisimile ratus, quòd sicuti in Oceano hisce temporibus majores *Æstus* quàm cæteris diebus *Lunaris Mensis* *Nautæ* conspiciunt, ob Dominatum quem supra Mare creditur habere *Lunare Sidus*, ita quoq; in *Atmosphærâ* notabili-

ter

ter aliqua Alteratio in Gravitate apparere debeat ; sed reverà ( inquit ) nihil Effatu dignum adnotare licuit ; nam in Noviluniis & Pleniluniis cunctorum Mensium nullum ferè discrimen in Mercurii altitudine respectu præcedentium & subsequentium Dierum compertum est ; sicuti neq; silente Lunâ quicquam memoratu dignum observatum ( a ).

At eximit hunc Scrupulum rectè perpenſa variè librati in *Fistulâ Torricellianâ Hydrargyri* Causa ; Habet illa quidem a *Ventis* originem, qui quamvis Lunarem Actionem perpetuò sequantur, fieri tamen minimè potest, ut Horum Effecta ad eundem modum ubivis Locorum incidant ; cùm ea sit harum Causarum conditio, ut *hic deprimant, illic verò eodem tempore aitollant* præ-

---

(a) *Ephemerid. Baromet. Mutin. Ann. 1694. P. 19.*



ter solitum suspensum Liquorem ;  
 Distracto nimirum & laxato in uno  
 Loco incumbentis *Aeris* Cylindro,  
 cujus Gravitas in alio augetur, ob  
 Accessionem densati, & in Cumu-  
 lum quasi coacti *Ætheris*.

Hinc fit, ut nulla super hâc re  
 institui possit certa & constans Ob-  
 servatio ; Utque iis Temporibus  
 quæ sunt *Ventis* maximè opportuna,  
 in horas ferè mutetur altitudo *Mer-*  
*curii* ; Uti de *Æquinoctiis* indicavit  
 jam dictus Author, Circa hæc enim  
*insignes Variationes*, ac præcipuè in *Æ-*  
*quinoctio Autumnali* inspexit, eâdem  
 die ad plures *Lineas* modò ascendente  
 modò descendente *Mercurio*, qui in *Sol-*  
*stitiis* eandem altitudinem quam diebus  
 præcedentibus habebat, prorsus serva-  
 vit ( a ).

Porro autem, ab aliis etiam Fon-  
 tibus, præter jam dictam Causam

---

( a ) *Ibid.* p. 20.



trahunt originem *Venti*, iisque inter se adeò diversis, ut incertâ Temporis Locique ratione, Horum Effecta subsequi necesse sit. Unde spirantibus *his* in adversum, aut in obliquum variis modis, fallit unius tantum Principii rationes subducentem Calculus.

Quæ verò incertos hos nulloque ordine recurrentes *Ventos* concitant Causæ præcipuæ, hæ sunt.

Primò, *Vapores Elastici* vi Ignis subterranei e Terræ visceribus erumpentes, & in Æthere a quibuscunque Causis densati.

Secundò, - *Effluviorum* e variis Corporibus Concurfus ejus naturæ ut Rarefactiones Fermentationesque quales a commistis *Chymicis* quibusdam Liquoribus vulgò evenire experimur, excitet. Hujusmodi  
enim

enim incidere interdum *Phænomena*, docet nos *Fulminum Meteororúmque* ratio.

Tertiò, *Montes Incendia evomen-tes & Terræ Motus*, quæ *Aeris Fluxus* ad diffitas usque *Regiones* propagant.

Quartò denique, *Cometarum aliorúmque Siderum Vires*, quæ *Solis Lunæque Imperium* variè turbant.

His accedit constans illa *Fluentis Aeris Causa, Solis Calor*; Ab hoc enim uti *Generales illos Statúsque Ventos* oriri, qui in *Mari Zonæ Torridæ*, five quod inter *Tropicos* jacet, spirant, ingeniosè demonstravit *D. Halleius (b)*; ita ubicunq; *Terrarum Eundem Motiones Ætheris*

---

(b) *Philos. Transact.* N. 183.



variè mutare posse, certissimum est.

Quinetiam, Scimus *Turbinibus* subinde agitari supernos *Coeli* Tractus quàm interim tranquillus est & serenus Terram proximè ambiens *Aer*. Et intercedere plurimis in locis increbrescentibus *Ventis* sublimia Montium Juga. Tot tantique prohibent Casus ne eundem ubique ordinem servant, quæ *Lunarem actionem* consequuntur Effecta.

Quibus sic ostensis, convenit jam demonstrare, quibus de Causis hi qui intumescite *Maris Æstu*, *Novâ Plenâque Lunâ* & tempore *Æquinoctiali* contingunt *Ætheris Motus Corporis Animalis Fabricam* immutent. In quam rem hæc tenenda sunt.

Primò,



Primò, Animantia omnia quo Spiritum suo commodo & fine labore ducant, *Aere* indigent ad certum modum *gravi*. Pondere nimirum suo in inanes Pulmonis Fistulas impellitur spirabile Fluidum. Quapropter, imminutâ eâ quâ dictum est ratione, his temporibus *Ætheris* ambientis *Gravitate*, minor solito in Thoracem haurietur ipsius Portio, quæ cùm minorum sit virium ad Sanguinem subigendum, illiúsque impetum quo ad Cordis finistrum Ventriculum fluit promovendum, tardiùs conficiet Circulum suum hic *Liquor*: Unde parcior erit Fluidi quod in Nervos derivatur *Secretio*.

Deinde, Non *gravis* solùm, sed & *Virtute Elasticâ* ad definitum gradum, præditus esse debet, qui Respirationi idoneus sit *Æther*. Sicuti enim ille ponderis sui vi irruit

ruit in *Asperam Arteriam* dum *trahitur Spiritus*, ita dum *redditur*, pelli solet, Musculorum Abdominis ope, in extremos hujus *Fistulae Ramos*, ubi concessâ, ob demptam incumbentem Pressionem, se explicandi libertate, illiduntur quaquaversus *Particulæ elasticæ* in *Vesicularum* latera, & coarctatis hoc modo *Sanguinis Canaliculis*, motui magis aptum reddunt *Vitale Fluidum*. Idcirco, quæ hanc *Aeris Facultatem* immutant, turbabunt simul *Compagis Animalis Motus*, memoratæ *Causæ*.

Experiuntur harum *Conditionum* necessitatem li, qui altissima *Montium Cacumina* ascendunt; his enim cum insigni labore & angustia ducitur *Spiritus*, & tantum non præcluditur; non aliâ de causâ, quam quod tenuis supra modum & purus illic occurrat *Æther*, hoc  
E est,



est, minùs quam par est *ponderosus* & *elasticus*, & cujus vix ea hauriri queat portio quæ inflando Pulmoni sufficiat.

Postremò, Inclusam continent Liquores omnes in Corpore animali *Auram* quandam *Elasticam*, quæ hanc habet naturam, ut Vinculis suis soluta vires suas exerceat in omnes partes. Et hæc quidem Motuum illorum intestinorum quos in Sanguine & cæteris Fluidis Vitalibus observamus, causa est. Quorum impetum dum in Canalibus suis fluunt, reprimit superficiem corporis ambiens Aer. Imminutâ igitur hujus Pressione Facultatem habet se protinus explicandi *Internus Æther*, pro ratione dempti de externo Elemento Ponderis. Hinc, fermentescentibus Humoribus, mutantur minimarum particularum  
Cohæ-



Cohæsiones & Nexus, & ultra modum tensi rumpuntur subinde tenuissimi Canaliculi.

Non aliâ ratione contingit hoc, quam quâ Animantibus ope *Antliæ Pneumaticæ* eliditur Spiritus ; hæc enim anhela primùm fiunt, deinde subtrahæto paulatim Aere intumescit corpus, collapsis in angustum ita sub mortem Pulmonibus ut Dissecantis sensum ferè effugiant (a).

Duo hîc prius quàm ad alia pergam necesse est ut moneam ; Primum, Effectum maximè notabilem jam expositarum causarum in his fore quorum imbecillum est Corpus & offensis obnoxia Valetudo ; Obistere contrà hisce *Influxibus* illos quibus est in Humoribus impetus major & firmioribus instructa Fibris Machina. Hanc ob

---

(a) Vid. *Esperienze dell' Accademia del Cimento*. p. 113.

rem, quæ hinc eveniunt interdum Mortalibus mala minime possunt ejus esse momenti ut imminuant Laudem quæ Artificio debetur Supremi rerum Arbitri, qui has Ætheri motûs leges posuit. Optimo Consilio prospexit Divinum Numen *Universis* Animalibus, fieri tamen non potuit quin *Singulis* nonnunquam & Paucis cederet in Detrimentum hæc ipsa Cura. *Solis* Situm & Distantiam a Tellure eo modo disposita esse quis dubitat, qui Rerum Universitati Lucis Calorisq; Diffusione maximè conducat? At nihilo secius noxii interdum evadunt nonnullis in Regionibus nimii Fervores; In aliis, adeò acris est Frigoris, mediâ hyeme, Vis, ut huic ferendæ pares esse non possint quibus est a Naturâ paulo infirmius Corpus; In omnibus, Tempestatum Vicissitudines Morbos



bos quandoq; pariunt. Optimè tamen humano Generi consultum esse, ab omnibus ultrò conceditur. Præterea, sicuti sua habent quiq; allati jam Casus Auxilia, ita tanta sunt *Fluxibus* hisce *Aeris* opposita *Obstacula*, tot modis ingruentibus hinc damnis occurritur, ut ea nullo loco habenda sunt præ insignibus quæ secum iidem ferunt Commodis, quorum ea est conditio, ut omnibus, quotquot alit Terrarum Orbis, Animantibus usui sint.

Deinde, hoc etiam sciendum est, suas quæq; Vires sortita esse & reliqua Sidera, quæ quamvis Solis Lunæq; Actionem non æquent, conspirant tamen variis modis ad horum *Influxus* in Corpora nostra augendos vel minuendos. Et tanti sane Momenti sunt hujusmodi *Concursus* ut extra dubium sit his quandoq; acceptam referri debere sub-



subitam & occultam Morborum Gentibus universis ingruentium Vim. Neque aliud Hercules est *Hippocratis*  $\delta\epsilon\acute{\iota}\omicron\nu\ \tau\acute{\iota}$  (a), cujus in Aegritudinibus rationem haberi jubet, quàm Ambientis Terram Aëris Status ab Astrorum Imperio genitus. Uti latius alibi dictum est (b).

Hâc denique de Causâ Antiquorum Observationem meruit *Canicula* (c), quod Sidus cùm maximum sit & in id tempus incidat ejus Ortus quo radiis Solaribus maximè fervercit Æther, incrementa hinc necessariò capient quæcunque nimios Calores consequuntur incommoda ; difficilior erit Morborum Cura, & a Febris ardentibus gravius solito imminet Mortalibus periculum.

(a) *Prognostic.* 1. (b) *Account of Poisons*, Essay 5.  
(c) *Hippocrät.* De Aere, Loc. & Aq.

## CAPUT II.

**H**IS sic expositis, Dispiciendum jam erit quas præcipuè Corporis nostri Actiones lædant Periodicæ hæ Liqueurum ipsius in Canalibus suis Turgescentiæ. Neq; propriâ tantum Observatione, sed & ex Medicorum Libris allatis Exemplis nostra confirmabitur Sententia. Revera enim hujusmodi Historias referentibus Authoribus tutò licebit adhibere fidem, cum nullus hîc sit *Opinionibus*, quæ corrumpunt plerunque Narrationes, locus ; & nuda constet Veritas extra Philosophorum Ratiocinia positus *Casibus*.

*Comitialis Morbus* cum aliàs sit difficilis, tum hoc ipso Mirabilis  
prorsus



prorsus Medentibus visus est, quòd *Novâ imprimis Plenâque Lunâ* soleat recurrere. *Regit* (inquit *Galenus* (a) ) *Luna in Epilepticis Periodos*. Dicti sunt, hâc de causâ a *Græcis* Scriptoribus hoc malo laborantes *Σεληνιαχοι* (b), in Historiis *Novi Fæderis* *Σεληνιαζόμενοι* (c), ab Authoribus verò *Latinis*, *Lunatici* (d). Vidit *T. Bartholinus* (e) Puellam *Epilepticam habentem in Facie Maculas, quæ pro variâ Lunæ Phasi tam colore quàm magnitudine variæ erant*. *Tantum* (ait Ille) *Corporibus nostris cum Cælo commercium*.

Retulit mihi *D. A. Pitcarnius* se Virum invisisse triginta annorum, Corporis habitûs paulo gracilioris, & Temperamenti ad Melancholi-

---

(a) *De Diebus Critic.* lib. 3. (b) *Alexand. Trallian.* lib. 1. cap. 15. (c) *Matth.* c. 17. v. 15. (d) *Apuleius de Virtutibus Herbar.* c. 9. & 65. (e) *Histor. Anatom.* Centur. 2. H. 72.



cum accedentis. Ipse jam ante novem annos, post largum Sanguinis è Naribus Profluvium, de subito questus erat quasi humoris alicujus a dextrâ ad summum Brachium ascendentis motu ; hinc Sensibus orbatus humi concidit ; Mox ad se rediens, Torpore tenebatur illius Manûs adeò gravi, ut nullus constaret Digitis Motus ; Brachium verò dextrum, ipso invito, ad quatuor horæ *Minuta*, magnâ vi prorsum retrorsum agitabatur, depedito interea Linguae usu. Recurrit a primo quo invasit tempore, hoc malum singulis annis, certo ordine, Mensibus *Martio* & *Septembri*, hoc est, circa *Æquinoctium Vernal* & *Autumnale*, *Novâ Luniâ*. His porro notabilis est iste Casus.

*Primò*, Sæpiùs de nocte quàm de die ingruit Paroxysmus.

*Secundò*, Nunquam Pedes aut Brachium sinistrum occupat hujus vis.

*Tertiò*, Qui jam, a primâ scilicet Ægritudinis Accessione, invadit *Stupor*, non aufert Sensus. Ambulat enim, urgente ipso, aut Equo vehitur Æger.

*Quartò*, Discurrente adhuc per manum *Humore*, perstat digitis Motus, cùm verò jam Brachium tenuit, amittitur ille simul cum horum Sensu. Obsidet hinc idem dextram Capitis partem, & violentas parit Brachii Motiones, ad tria quatuorve *Minuta*.

*Quintò*, Iis Anni temporibus, quibus incessit Morbus, bis aut ternonnunquam horæ spatio redit  
*Torpor*,



*Torpor*, interdum semel tantum intra biduum aut triduum.

*Sextò*, Deteriorem fecit hanc Infirmitatem *Balnearum* calidarum *U*-*sus* ; graviores enim solito erant qui subsequabantur *Paroxysmi*.

*Septimò*, Denique, Labefactatur insigniter *Memoria*, circa tempus ingruentis Mali.

Fœminas complures sibi notas testatur Vir in Medicinâ prope singularis, quæ ad *Lunæ* motum Symptomata *Epileptica* patiuntur ; *prægnantes* imprimis, & quibus, cum maturiùs solito *parere* desierint, defecerunt ante consuetum tempus *Profluvia* menstrua. Hæ in somnis sæpè, interdum & de die, his *Paroxysmis* tentantur.

Duas porro se curâsse meminit Puellas, quibus Motus *Epilepticos*



apportabat *Luna* ridiculos planè, & qui Morbum quem *Chorem Sancti Viti* appellat vulgus referebant. Incerti erant & ad similitudinem Saltationis ferè compositi Gestus; suppressa quinetiam vigente maximè Paroxyfino Vox. Hoc Malum laudatis à D. *Sidenhamo* in *Schedulâ Monitoriâ* Medicamentis depellere frustra aggressi fuerant, qui *Menstruos* ipsius Circuitus non animadvertabant Medici.

Mirum prorsus & minimè vulgarem deprehendi non ita pridem Ipse in Puero hujus Ægritudinis cum *Lunâ* concentum. Erat Ille quinq; circiter annorum, & adeò graves miserum torquebant *Convulsiones*, ut conclamatum ferè non semel jaceret Corpus. Remediis tandem ægrè cessit Morbus. At post aliquot dies ingruebat denuò,  
plena

plenâ *Lunâ*, servantibus *Sideris* Pe-  
 riodos ita constanter Paroxysmis,  
 ut Maris Æstibus quotidie respon-  
 derent. Suppressa semper erat Vox  
 & ablati Sensus affluentibus ad Lit-  
 tora Aquis, refluentibus his ad se  
 rediit æger. Animadvertit hoc ip-  
 sius Pater, habitat enim ad Ripam  
*Thamisis*, & Magister est Navigii  
 onerarii, quocirca Fluvii Cursus  
 sedulo servare solet. Constans verò  
 adeò & status fuit reciprocantis  
 Mali ordo, ut de Lecto non semel  
 furrexerit Parens ad ea quæ sui  
 erant Muneris agenda, Clamori-  
 bus Filii Sensum, discussâ Paroxys-  
 mi vi, recuperantis, è Somno sus-  
 citatus, & de *Refluxu Fluminis* cer-  
 tior factus. Mansit per quatuor-  
 decim dies hæc Morbi conditio, ad  
*Novam* nimirum *Lunam*, quo tem-  
 pore, è siccæ Scabiei, quæ ab ad-  
 moto in initio Mali (uti mihi sæpe  
 in



in hujusmodi Casibus Mos est) Occipiti Emplastro *Epispastico*, summum Verticem obduxerat, avulsâ Crustâ, profluxit inopinatò magnâ copiâ ferofus & limpidus Humor. Levabat ægrum diris Cruciatibus hæc Eruptio ; Hinc id magno studio agebam, ut perstaret ad longum tempus hoc è Capite *Liquoris* Effluvium ; & impositis quæ supercrefcentem Carnem coercent Cataplasmatibus, res ex voto successit. Cùm verò tæderet tandem hujus Curæ Parentes, inducta est Ulceri Cicatrix, Et purgato ter quaterve, sub *Novam* imprimis *Plenâmque* Lunam, *Mercurio dulci* & *Pharmacis* consimilibus, Corpore, incisa est in Brachio sinistro *Fontanella*, ad præcavendum aliquâ ex parte Morbi recursum ; nam in Occipitio, quâ summa Cervicis Vertebra cum Capite committitur, Vulnus infligere (quod



(quod in rem Pueri proculdubio fuisset) per amicos non licuit. Immunis tamen hoc pacto ab omni gravium Symptomatum accessione servatus Æger, robustis jam viribus adolescit.

Jure fortassis quis credat, Ignorantiam *Causarum* de quibus agitur in causâ esse quòd nullæ occurrant in immensis Rerum Medicarum Voluminibus hujusmodi Historiæ, & fore demum quum Harum diligenter habebitur ratio, ut non rara extent consimilis Συμπληρωμα Exempla.

Unum porrò restat ut moneam, nimirum Illos *Maniacorum Furores*, qui ad *Lunæ Circuitus* revertuntur, conjuncta etiam secum ferre *Comitialis Morbi Symptomata* ; id quod se perpetuò comperire mihi non semel affirmavit Doctissimus Vir, D. *Tyson*, in *Nosocomio Mente Captorum Lond.*

*Lond.* Medicus, qui idcirco hoc modo ægiotantes *Insanos Epilepticos* appellare solet.

Hæc cum ita se habeant, minimè mirum est ex Veteribus quosdam (uti Authore *Aretæo* (a) discimus) hunc Morbum ad *Lunam* penitus retulisse, opinantes Illam hoc Mali genus Sceleratis hominibus, in Flagitiorum pœnam, immittere, & *Sacrum* propterea ducentes.

Congenerem *Comitali Morbo Vertiginem* dicit *Galenus* (b); hinc *Parvam Epilepsiam* antiquitus appellatam esse scriptum reliquit *Cœlius Aurelianus* (c). Hoc certe huic Malo cum illo convenit, quòd utrumq; *Lunares* plurimum servet Periodos. Hoc idem testantur quàm plures a *Pitcarnio* notati Casus.

---

(a) *Aret. Cappad. de Diuturn. Morb. lib. 1. c. 4.* (b) *In Aphor. Hippocr. Comment. 3. Aph. 17.* (c) *De Morb. Chron. lib. 1. c. 2.*



Ad Epilepsiam deniq; referendi sunt qui *Hysterici* vulgò audiunt *Affectus*, quibus eo feliciùs medebitur quis, quo horum Periodos diligentius animadverterit. Nar-  
rat Casum *Pitcarnius* sibi notæ Mu-  
lieris juvenis at nuptæ, obeso cor-  
pore & Crine rubræ; cui justo par-  
cius fluxerunt semper *Menses*: Illa  
jam a quatuor annis quæsta fuit de  
molesto *Compressionis* in Vertice sen-  
su, descendente simul ad Humeros  
usque gelido Humore, cum gravi  
*Vertigine* & Strangulatione Fauci-  
um. Evomit quinetiam Venticu-  
lus acrem Pituitam; Dolore & an-  
gustiâ premuntur Præcordia; ur-  
gétque mane cum de lecto surgit,  
Spiritus Difficultas. Recurrunt or-  
dine constanti hæc Mala, Novâ  
Plenâq; Lunâ.



Morbum recenset *Carolus Piso* (a), in describendis Ægritudinum Historiis nulli secundus Author, *Illustris Fœminæ*, cui, non sine sensu Suffocationis, circa *Novam Lunam*, gena sinistra cum colli parte manifestum in Tumorem tollebatur. Et visam sibi memorat *Puellam* (b), quæ toto Vere circa *Plenilunia* Symptomatis hystericis percussa fuit tam pertinacibus ut totam *Lunæ* quadram durarent; nam cum primum diem reciprocis Motibus conquateretur, biduum post avaritia soporq; altus eam detinebant; reliquum quaternarium quiritabatur, nugabatur, sive leviter delirabat, vigilabátque.

*Paralyses Periodicas* observarunt non rarò Medici. Oppressit Virum annis gravem (Historiam referente *Pisone* (c)) cum ingenti Lassitudi-

---

(a) *De Morbis à serosâ Colluvie*, Obs. 27.

(b) Obs. 28.

(c) Obs. 16.

ne Somnolentia ; accedebant *Resolutio Nervorum* ac Stupor, Oblivio, & quædam Defipientia, cum Febre. *Reducebat has Querelas per duos annos Nova semper Luna, mitescentibus sensim Symptomatis, & extremis Recursibus umbram duntaxat seu Imaginem exhibentibus eorum quæ primis Periodis fuerant observata.*

Reciprocantis *Membrorum Tremoris* insigne Exemplum suggerunt nobis *Nicolai Tulpii* (a), animi Candore & acri Judicio commendati Scriptoris, Adversaria ; Qui integrum triennium pallidam & habitûs planè pituitosi Virginem exagitavit, non assiduò sed interpolatis duntaxat vicibus, durante quâlibet Periodo ad horas fermè duas, cum Gutture rauco & suppressâ Voce.

---

(a) *Observ. Medic. lib. I. cap. 12.*



*Circuituum autem ordo ( sunt ipsissi-  
ma Authoris Verba ) conveniebat  
manifestè, modò cum Maris, modò cum  
Lunæ, modò cum Solis Motu ; prout  
enim horum variaret ratio, pro eo eti-  
am, vel celerius, vel tardius, accedere  
& recedere reciprocantis Tremoris Cir-  
cuitus.*

Permagni esse Momenti Lunam  
ad concitanda illa *Mulierum Proflu-  
via* quibus a *Menstruis* quas servant  
vicibus impositum est Nomen, non  
ex Opinione vanâ, sed sedulâ Ob-  
servatione compertâ re, affirmârunt  
Veteres. Et recurrerent sanè, du-  
bio procul, universis Fœminis eâ-  
dem certâ Lege hæ *Purgationes*,  
nisi obstarent aliæ graviores Causæ,  
& Sideris hujus Influxui intercede-  
rent varia singularum Viçtûs Vitæq;  
ratio, infinitum Temperamento-  
rum discrimen, & incerta denique  
pluri-



plurimorum Casuum Vis & Effici-  
entia. Certum est, in Regionibus  
propiùs ad *Æquatore*m fitis (ubi va-  
lidissimam esse Lunarem Actionem  
ostensum est) copiosius fluere Men-  
ses; in iis contrà quæ *Polis* sunt  
viciniores (cùm illa ibi fit debilior)  
parciùs. Id in *Borealibus*, impri-  
mis observavit *Hippocrates* (a), qui  
& hanc reddit in *Scythicis* Mulieri-  
bus Sterilitatis Causam.

Hæc cùm sit *Purgaminum Mulie-*  
*brium* conditio, minimè mirum est,  
si & Viris quandoque eveniant *Pe-*  
*riodica Hæmorrhagia*; Sicuti enim  
(ut brevibus rem hanc totam expe-  
diam) major, pro ratione *Molis*,  
*Sanguinis* in *Fœminis* quam in *Vi-*  
*ris* copia, causæ est quòd ille certis  
intervallis per peculiare meatu è  
corpore exeat, iisque maximè qui-

---

(a) *De Aere, Locis, & Aq.*

bus imminutâ aeris ambientis pressione, facultatem se explicandi habet interna aura ; *Ita* & in Mari-  
bus, illis imprimis quorum imbecilior est natura, & infirmius Fibrarum robur, si quando nimîâ *Plethorâ* turgescant Vasa, rumpentur ea necessariò illis potissimùm temporibus quibus horum distensionem minimâ vi reprimat externus Æther.

Invisit Me, proximè elapso anno, generosus Juvenis, infirmiore Corporis Fabricâ, cætera sanus, cui per sesquiannum redierat, *Novâ* constanter *Lunâ*, *Sanguinis Sputum* ; Perstitit illud ad quatuor semper aut quinque dies, sensim imminuto Profluvio ; quod eo singulis Recursibus sensit urgere vehementiùs, quo majorem Venarum *Plenitudinem* fecerat *Victûs Vitæq* ; ratio.

Memora-



Memorabilis est, tum Morbi ipsius, tum qui hunc comitabantur Eventuum nomine, D. *Pitcarnii* Casus. Is cum in *Scotiâ* haud procul *Edinburgo* Ruri esset, anno (si bene ipse meminit) 1687. Mense certe *Februario*, Cœlo solito magis sereno & rubente Sole, in ipso *Lunæ Coitu*, subitum habuit, sine manifestâ causâ, *Sanguinis* è *Naribus Profluvium*. Præcesserat insolitæ *Viri* Imbecillitatis gravis Sensus. Postridie in *Urbem* reversus, comperit in *Baroscopio* eâ ipsâ horâ (fuerat enim nona *Matutina*) altiùs subsedisse *Hydrargyrum* quàm aliàs unquam id descendere aut *Ipsi* aut *D. Gregorio* (cujus in *Ædibus* asservabatur) visum fuerat. Mortuum quinetiam eodem tempore concidisse *D. Cockburne* Professore *Philosophiæ*, ex repentinâ *Sanguinis* è *Pulmone Eruptione*; Ex Amicis denique



niq̃ue qui ipsius opem, affligente quavis Ægritudine implorare solebant, quinque aut sex aliis atque aliis Humoris *Profusionibus* tentatos, in eodem illo temporis Articulo condoluiffe.

Duo nobis in hanc rem Exempla subministrant *Regiæ Societatis Collectanea*. Alterum refert Medicus Celeberrimus D. *Musgrave* ; quod est hujusmodi (a). Viro cuidam ab ipsa Infantia ad annum usque ætatis vicesimum quartum profuxit *Plenâ* semper *Lunâ* Sanguis ex Pollice sinistro, primùm quidem ad Uncias quatuor, post annum verò sextum decimum, ad semilibram. Quem Fluxum cùm ille, adustâ Ferro candente parte, inhiberet, incidit mox in gravem *Hæmoptœen*,

---

(a) *Philos. Transact.* Numb. 272.

ex quâ, Sectâ sæpius Venâ, & idoneorum Medicamentorum ope, difficulter demum & ægre evasit. Alterius Summa hæc est (a). Caupo quidam *Hybernus*, ab anno ætatis quadragesimo tertio usq; ad quinquagesimum quintum, *Effusionem Sanguinis* habuit ex Indice Digito manûs dextræ, singulis fere Mensibus recurrentem, ad libras circiter quatuor; quæ si quando arte restringeretur, urebat Brachium acerrimus Dolor. Minus quidem cum *Lunæ Motu* congruebant *hujus* quam *illius* Mali Circuitus, ob enormiorem fortassis Vitæ modum, & Detrimentum quod Ægri Sanitati attulit immodica emissi humoris copia; hoc ipso tamen Memoria imprimis digna est ista Narratio, quòd *Festo Paschatis*, hoc est,

---

(a) *Philos. Transact.* Numb. 171.



proximo post *Æquinoctium Vernal*  
*Plenilunio*, profluxit primò Sanguis ;  
 quod anni tempus hujusmodi Mor-  
 bis maxime opportunum esse, ex  
 supradictis manifestum est.

Istud porro nos hic perpendere  
 oportet, ab Experimentis *Sellæ* suæ  
*Staticæ* edoctum comperisse *Sancto-*  
*rium* (a), principem hujus discipli-  
 næ Authorem, *Corpora Virorum sana*  
*& moderatissimo Victu* utentia, singu-  
 lis mensibus fieri solito ponderosiora,  
 unius scilicet duarúmve *Librarum* pon-  
 dere, & redire ad consuetum pondus  
 circa finem *Mensis*, ad instar *Mulie-*  
*rum* ; sed factâ *Crisi* per *Urinam* pau-  
 lo copiosorem vel turbidiorē. Qua-  
 propter, Fiet ex ea re necessariò,  
 ut illis *Valetudinis Vitiis*, men-  
 struis intervallis, obnoxius sit *Ro-*  
*bustissimus quisque*, quæ a *Repleti-*

---

(a) *Medicin. Static. Sect. 1. Apor. 65.*

onē ducunt originem ; Ut, illis temporibus instet imprimis ab his periculum, quibus levissimo pondere distensa Vasa repellit ambiens Æther ; Et denique, ut, cū parum fere sint Virium *Nova Plenaque Luna*, in *hanc* modò, modò in *illam* incidant hæc Morborum genera, prout opportunius est alterutri *Influxui* Corpus, & congruit magis cum hac aut illâ Sideris Periodo, Humorum *Plethora*.

Tum frequens tum difficilis est ille Mulierum Morbus, quem *Fluorem Album* appellant Medici. Et hunc quidem per quatuor annos, *Novâ*, singulis Mensibus, *Lunâ*, recurrentem, persistente semper octiduum Profluvio, observavit *Pit-carnius*.



Incerta est, & variis subjecta Casibus, *Ulcerum* conditio, & habent hæc tamen interdum, certâ lege, suos *Humoris Æstus*. Eru- ditum Juvenem memorat G. Bagli- vi (a), Ingenii minime vulgaris Vir, Cui, Cùm laboraret *Fistulâ Ster- coraceâ* in *Intestino Colo* prope *Jecoris* regionem, crescente *Lunâ* ingens *Ster- corum Humorûmque* copia ex *Ulcere* prodibat, quæ paulatim, eâdem decre- scente minuebatur; Cujus rei ita cer- tam habebat experientiam *Ægrotus*, ut de *Lunæ Quadraturis* & *Periodis* solâ *Humoris per Fistulam excreti observa- tione* rite judicaret.

Reducit mihi in memoriam hæc Narratio Adolescentis cujusdam In- fortunium, qui a *Venereo* cum impurâ *Muliere Coitu* sensit pri- mum in *Dorso Dolorem*, in Femo-

---

(a) *De Experiment. circa Sanguinem*, p. m. 242.

ribus verò Gravitationem cum Imbecillitate ad motum, per quatridentum. Natum inde est in ipsâ Colis Glande Ulcusculum, è quo profluxit Pus mali odoris. Intra septimum diem desiit sponte suâ ille Fluxus; at Novâ Lunâ revertebatur denuò, persistente per aliquot Menses hâc Mali conditione, nimirum usque donec idonea adhiberentur Remedia; quibus tandem penitus cessit.

*Renum Dolores* per Lunaria intervalla reciprocantes animadvertet non rarò, quisquis æquam horum habuerit rationem. Morbum descripsit N. Tulpus (a), Henrici Ainswordi, Theologi Britanni, apud Amstelædamenses, cui supprimebatur Urina, quolibet ferme Plenilunio, cum insigni angustia, & evidenti totius Corporis

---

(a) *Observat.* Lib. 2. cap. 43.



*incendio, ad diem quartum. Neque excernebatur illa iterum, nisi vel declinante Lunâ, vel sectâ Brachii Venâ. Et Periodicum simul se vidisse retulit (a) Capillorum Miſtum, quolibet decimo quarto die revertentem, cum insigni Urinæ difficultate, & tantâ perturbati Corporis inquietudine, ut vix in Cubili se contineret Æger.*

Inspexi nuper sectum Pueri quinquennis Cadaver, cui Mortem accelerârunt graves *Nephritidis* cum Vomitu & Alvi Fluxu, Accessiones. Oppleti erant tum Renes tum Ureteres Materiâ *Calculosâ*, quam varias hîc illic cernere erat induisse Concretionis Formas. Primum Mali Fundamentum erat *aqueus* & limpidus *Humor*, qui paulatim *Lactescens* in tenues & ramosas *Crystallos* abiit, quibus in unum coeuntibus

---

(a) Ibid. Observ. 52.

accessit tandem *lapidea* Durities. Affirmavit mihi D. *Groenvelt*, harum rerum apprimè gnarus Medicus, qui confectum his ærumnis *Misellum* sæpiùs inviserat, comperisse se *Plenam*, per aliquot Menses, *Lunam* attulisse semper diros *Ægro* Cruciatus, quos elapsus plerumq; per Iter *Urinæ* unus aut alter *Lapillus* levabat.

Menstruas sæpe habere Recursûs vices *Spiritus* *Difficultates*, ab *Experientiâ* didicit subtilis judicii Vir, *Helmontius* (a); *Exacerbatur* (inquit ille) *Asthmatis* *Paroxysmus* *Lunæ* *Stationibus* & *Ævi* *Tempestatibus*, quas ideo præsentit & præsagit. Confirmat hoc ipsum J. *Floyerus* eruditus Eques, qui in describendâ hujus Morbi Historiâ, cæteris

---

(a) *Asthm & Tuss.* §. 22.



omnibus palmam præripuit ; Deprehendit nimirum Is (a), quatuordecim dierum intervallo reverti plerumque has Anxietates, & Lunæ Circuitibus consentire.

Insolitum & rarum *Lunaris Facultatis Effectum* memoriæ prodidit, Doctrinâ Studiôque pariter laudandus *Kerckringius* (b) ; Nota ipsi erat *Matrona* quædam *Galla*, quæ tempore *Plenilunii Facie* prædita erat *rotundâ*, & sanè quàm *formosâ* ; sed decrescente *Lunâ*, *Oculi*, *Nasus* & *Os* in unam partem vertebantur, ita ut deformis admodum in publicum prodire non sustineret, donec crescente iterum *Sidere*, rediret & ipsa paulatim ad suum *Plenilunium*, & *Formæ suæ Venustatem*. Hoc si cui mirum vide-

---

(a) *Treatise of the Asthma*, pag. 17.  
tom. 92.

(b) *Observ. Anatom.*

atur, referenti Authori fidem facient comperta Vulgo in *Conchyliis* & multis Animantium generibus, con-  
similis Virtutis Exempla ; Nam,  
ut cecinit olim *Lucilius* (a), sapi-  
ens Poeta,

*Luna alit Ostrea, & implet Echinos,  
Muribu' fibras,  
Et Pecui addit ———*

Et post hunc *Manilius* (b) ;

*Sic submersa fretis Concharum &  
Carcere clausa  
Ad Lunæ Motum variant Animalia  
Corpus.*

Multis impedita Difficultatibus,  
& arduæ Disquisitionis est, *De Cri-  
sibus* in Morbis acutis Doctrina,  
operæ pretium itaque est, nunquid

---

(a) Apud Aul. Gellium, lib. 20. cap. 8.  
mic. lib. 2.

(b) *Astrono-*



ad hanc explicandam conferat nostra Disputatio, paulò diligentius investigare. Magnum habere Momentum ad Medicinam rectè faciendam *Dierum Criticorum* Considerationem, putârunt semper Veteres, & ad horum rationem distinxerunt *Februm* tempora ; Obsoletum jam est hoc Studium, & irridet aut supervacaneam ducit Medicorum Vulgus omnem de hisce Quæstionem. Idq; duabus, quantum ego Conjecturâ assequor, potissimum de Causis.

Primò, Habebantur quæ hanc Artem effecerunt primæ Observationes in *Orientalibus* & *calidis* Mundi Plagis ; Cùm ergo illæ in *Borealibus* & *frigidioribus* Regionibus ad Usus reducerentur, nullâ habitâ Locorum Discriminis ratione, fefellerunt non rarò Medicorum Opinionem

nionem, nec ad spem respondit Eventus.

Deinde, Perpaucis Remediis constabat antiquitùs Medicina, neque aliam *Febribus* adhibere Curam moris erat, quàm quæ tenui Victu vim & ferociam Morbi aliquatenus reprimeret; *Naturæ Ministros* se præbebant Medici, & *Hanc* sequentes Ducem ad varios Humorum in Corpore motus animum advertebant seduló. Postquam vero in diversas Curandi vias processerunt hujus atque illius Sapientiæ Professoris æmuli, & ex *Opinionibus* magis quàm ab *Experientia* natis *Monitis* res agi cœpit, nullus relinquebatur iis *Præceptis* locus, quæ a priscâ Medendi ratione pendebant; cùm non uno modo torquerentur jam Ægroti, & incertum læpe esset quinam ab ipso Morbo ducerent originem Do-

I 2

lores,



lores, quóſve afferrent ingeſta perverſo more Pharmaca.

Quo certiùs itaque conſtet quibus præcipuè innixa ſit Fundamenti hæc Antiquorum Diſciplina, & ad quam Normam exigere Obſervationes ſuas debeat quiſquis horum hâc in parte Studium æmulari exoptat ; Pauca quædam in medium proferenda ſunt.

*Primò* ; Habent Morbi omnes *Επιδημιοι*, ſive qui in Populum ſæviunt, ſua quique, certo ordine diſtributa, *Tempora*, quibus increſcunt, conſiſtunt, & ad Sanitatem inclinant. Conſtantes adeò & perpetuæ ſunt horum Leges, ut quoties a *Cæli Statu* oriuntur *Febres*, quarum *Acceſſiones* in pleriſq; ſine intermiſſionibus urgent, ſi modò contingat has quavis de *Cauſâ*, in aliis

aliis per circuitus redire, pensentur semper Paroxysmorum numero cessantis Morbi intervalla, ita ut parem mensura ægritudinem sustineant utroque modo laborantes.

Id ipsum solâ *Experientiâ* comperit, in indagandis Morborum Historiis solertissimus *Sydenhamus*, qui hâc de causâ sex Menses durare *Quartanas Autumnales* animadvertit (a), quoniam si ritè ponatur calculus, inter omne id tempus recurrentes Accessiones horas complent 336, five dies 14; qui quidem *Continuarum* Februm quas eadem anni Tempestas apportat Terminus est.

Neque discrepat ab hac ratione *Galen*i Observatio (b), ideò nimirum, septenos habere Circuitus

---

(a) *De Morb. Acut.* p. m. 95. (b) *Comment. in Aphor. Hippocr.* lib. 4. Aph. 59. & *de Crisib.* lib. 2. c. 6.



*Exquisitam Tertianam*, cùm *Legitima Continua* intra septimum diem desinat, quia *unum conficiunt diem singuli Paroxysmi* ; hoc est, dispar licet sit hujus & illius Morbi conditio ; æquale tamen est quo Corpus ab alterutro tenetur, temporis spatium.

Causa porrò cur istud ita eveniat hæc est, nempe,

*Secundò* ; *Fermentatur* in hisce *Malis Sanguis*, neque defervescit ille, usque donec per *Organa Secretionis*, prout his aut illis magis accommodatus est Humor, foras derivatæ fuerint plurimæ Morbum commit- tentes particulæ.

*Tertiò* ; Sicuti suis quisque temporibus defæcantur qui fermentescunt Liquores, sic definitum habet

bet spatium quo depuratur a *Fermento Vitale Fluidum*.

*Quartò* ; Denique , non eodem perpetuo Tenore cursum suum peragunt quæ conjuncta secum fert hæc Sanguinis *Effervescentia* Symptomata, illa verò horum ratio est, ut *certis* imprimis *Diebus* adeò manifesta sui prodat indicia Morbus, ut non difficile sit ex iis, felicem an infaustum *Exitum* habitura sit *Ægritudo*, conjecturâ augurari.

Hâc perspectâ Februm conditione, Veteres *Dies* illos qui Morte aut Sanitate finiebant plerumque Morbum, *Decretorios* appellârunt ; Hos verò quibus præcipuè Spei aut Periculi ostendebantur Notæ, nominârunt *Decretoriorum Indices*.

Et hætenus quidem non erat conjecturalis hæc Scientia ; adjuncta verò



verò demum probis Observationibus perversa Ratiocinia magnis implicuerunt dubiis eam Quæstionem. Nescivit *Hippocrates* istius Morborum acutorum naturæ Causam, quæ Ægrum liberabat Dies *septimus*, *quartus decimus*, aut *unus & vigesimus*. Famâ inter alias eminebat illis temporibus *Pythagoræ* Schola, cujus magna Scientiæ pars in *Harmoniâ* & reconditis *Numerorum* Mysteriis posita erat; *Impares Paribus* efficaciores habebantur, summa verò tribuebatur *Septenario* potentia. Has Philosophi Opiniones ita sequebatur divinus in Medendo Vir, ut Recidivam timeret si pari die desisset Febris (a), & *decimum quartum* aut etiam *unum & vigesimum* diem expectaret, nisi *septimus* Morbo finem fecisset; quoniam *multum*

---

(a) Aphor. Sect. 4. 36.

potest tum in *Ægreditudinibus*, tum in Partu edendo, Numerus Septenarius (a).

Cum verò certum esset, solvi interdum Febre laborantes, Die sexto aut octavo, sine periculo Recursus, has Rationes ut vanas repudiavit *Asclepiades* (b), & jure Sententiam dixit *Celsus* (c), In his antiquos, tunc celebres admodum, *Pythagoricos Numeros* fefellisse.

Isto animadverso Errore, *Galenus* felicius longè in hac Disquisitione processit; nec ab *Imparium Dierum* Efficaciâ ducere originem censuit *Febrium Accessiones & Crises*, sed a Facultate *Lunæ*, quæ *Terrestribus* imperat, & cætera *Sidera* vincit, non Potentiâ, sed *Vicinitatis Virtute* (d).

Habent itaque, si ipsius auctoritatem sequi velimus, *Circuitus*

(a) *De Septimest. Partu.*

(b) *Vid. Celsum, lib. 3. cap. 4.*

(c) *Ibid.*

(d) *De Dieb. Decretor. lib. 3.*



fuos, quibus septem dierum intervallis accedunt & inclinant Morbi acuti, a Cursu *Lunæ*, quæ *singulis Hebdomadis*, cùm nimirum *Illa Nova, Dimidia, vel Plena est*, *Viribus pollet maximis* (a).

Ex hisce manifestum est, ritè advertisse *Galenum* Causam quæ *Paroxysmos* *Febrium* immutet, at *Modum* quo hæc Effectum parit, non fuisse conjecturâ assecutum. Summa Rei hæc est.

*Crisis* est *Materiæ* Morbum facientis per hos aut illos *Corporis* meatus *Expulsio*, quæ ut cum *Ægri* Salute peragatur, eatenus illa comminuenda & digerenda est, quoad permeare & transire possit per *Ora Glandularum* ad quas appellit. Idcirco, sicuti perfectissima fit *Sudoribus* *Febris* *Solutio*, (tum quòd Na-

---

(a) *De Dieb. Decretor.* lib. 3.

turâ cæteris omnibus plus Liquoris exspuant *Subcutaneæ Glandulæ*, tum quoniam per angustissimos harum Tubulos non alius quàm tenuis & probè *concoctus* Humor percolari queat,) ita maximo cum periculo Morbum Finit *Sanguinis Fluxus*, indicat enim ille eam esse Mali indolem, ut per nullas Corporis *Vias* defæcari possit Sanguis, qui proinde *Effervescentiâ* suâ Canales dirumpit. Mediam hîc conditionem habent geniti in illis Partibus *Abcessus* per quas crassi & tenaces expurgantur Succi.

Certum est igitur, si modò in *Novam Plenâmvæ Lunam* incidat Tempus, quo aut a *Defervescente* Sanguine foras pellitur noxius Humor, aut *Profusionem* minantur ultra modum tensi ab *Æstu Febrili Canaliculi*, eò faciliorem & pleni-



orem fore Morbi *Crisin*, quòd minore tum vi Corporis superficiem urgeat, & Fluidorum impetum reprimat circumfluus Æther. Fieri quinetiam posse, ut ob variam hujus Causæ rationem, *hodie* interdum peragatur quam, pro more & conditione Ægritudinis, *crastinus dies* apportare debebat, Febris *Solutio*; aut in *posterum diem* contrà differatur, qui *hodiè* sperandus erat Morbi Terminus; Cùm acceleretur Motus Naturæ a Facultate Lunæ, & hujus ope nonnunquam indigeat, ad amovendum Aeris Obstacleum, solito debilior Animalis Machina. Idcirco, *sexto* quandoq; quandoq; & *octavo*, uti observavit *Hippocrates*, solvetur Morbus, cujus Circuitum *septimus* in plerisque Dies definit.

Conve-

Convenit itaque, si *Lunaris Virtutis* in hisce Casibus Momentum perpendere velimus, Tempus quo primùm invasit Morbus diligenter notare ; *Hujus* deinde Indolem, & quonam *Secretionis* genere, Salutem *Ægri* moliri soleat *Natura* probè nōsse ; neque nimiā sedulitate, præsertim sub finem *Ægritudinis*, *Humorum Motus* turbare ; *Laborantis* denique *Vires* æstimare atque expendere. Comperiet dubio procul si quis has in faciendâ *Medicinâ* *Leges* servaverit, non *Novam* solùm *Plenâmque Lunam*, sed & *Sideris* ad *Meridianum Cœli* fastigium, aut huic oppositum Locum, *Accessionem*, ad immutandum *Corpus animale* vim afferre maximam.

Comprobant id ipsum, & Nobis quasi ob oculos ponunt, *D. Paschalii de Partu & Morte Animalium*, nec non de *Morborum Accessionibus*,  
 Obser-



*Observationes (a)*; Partitur, nimirum, ille Νύχθημερον in quatuor *Senarios* Horarum; *Primum* conficiunt tres Horæ antecedentes Lunæ ad *Meridianum* Cœli Verticem appulsum, unà cum tribus quæ hunc subsequuntur; *Secundum* verò, quæ his proximè succedunt Sex Horæ; Ex reliquis denique *Diei veri* Partibus constant *Tertia & Quarta* *Ægæ*. Hinc animadvertit, Nullum Animal Nasci aut Mori tempore *Primi* aut *Tertii*, quos *Fluxûs Senarios* appellat; Contingere verò omnem tum Partum tum Mortem *Secundo* aut *Quarto*, quibus *Refluxûs* imponit Nomen. Incessere quinetiam, in *Febribus intermittentibus*, Paroxyfmi plerumque Vim *Fluxûs* horis, Solvique mox sudoribus eundem *Refluxûs* tempore. Ex his

---

(a) *Philos. Transact.* Numb. 202.

colligit, Motum, Vigorem, & Impetum perstare maximè *Fluxûs Senariis* ; Quietem contrà, Imbecillitatem & Interitum, ad *Refluxûs Senarios* præcipuè pertinere.

Non falsò itaque *Memoriæ* olim prodidit *Aristoteles*, *Nullum Animal nisi Æstu recedente expirare* (a).

(a) *Vid. Plin. Hist. Nat. lib. 2. cap. 98.*

---

CAPUT

---



## CAPUT III.

**A**D usum demum quem Nobis in Medendo præbeat hæc Disquisitionis, transeundum est ; Et is quidem non foret nullus, si ad Prædictiones *Accessionum* & *Eventuum* in Morbis solummodò spectaret, cum istiusmodi Judicia Medicorum concilient Honorem, Ægrorum verò Spem & Fiduciam confirment. At verò majus hinc Emolumentum consequemur, ipsam enim Morborum *Curam* ab hisce Ratiociniis promoveri ostendam. Et primò quidem dicam quod est universalius, ut ad ea quæ de Singulis observanda restant, sternatur Via.

Satis itaque constare arbitror, Morbos omnes quorum Circuitus *Lunæ* Periodis respondent, esse a *Repletionē* oriundos. Cum enim *Actio Lunaris* per solam Vasorum Distensionem Effectum fortiatur, liquet illam Plenitudinem tantum augere, quæ five *Moli* Fluidorum, five eorundem *Turgescentiæ* debeatur, idem valet.

Ideoque in omni Malo per singulos Menses semel aut iterum recurrente, quod ab Influxu *Lunæ* Vires acquirit, usui erit *Depletio*; quæ si non Morbo Medelam, at saltem levamen feret.

Quoniam verò in hoc Remedio, spectanda sunt imprimis *Ægitudinis Genus*, & *Detractionis Modus* & *Tempus*, quædam erunt de his omnibus tenenda Præcepta.

Convenit ergo Expendere primum, num in Arteriis hæreat Causa

E

Mor-



Morbi, an verò Vitio Liqueurum qui è Sanguine derivantur, in *Partem* quamvis Corporis *principem* transferatur. In priore Casu, plus *Missioni Sanguinis*, in posteriore, plus *Medicamentis*, quæ Errores ejusdem emendent, tribuendum erit.

Præterea, cùm *Experientiâ* Duce, discamus tutissimè *demi* Materiam per Vias quas Natura monstrat ; per quos Meatus in quovis Malo sponte ægrotantis fiant Purgationes, diligenter animadvertendum erit.

Deinde, *Tempus* maximè opportunum *Detractioni* erit in plerisque Casibus paulo ante Accessionem Mali, cùm hoc modo non solum venienti Morbo occurratur ; sed & turgescens Materia faciliùs & copiosius è Corpore erumpat.

Sed

Sed de his quidem luculentius erit Judicium, si quædam ad Morborum, quos prius recensui, Curam pertinentia, brevibus saltem expediam.

A *Morbo Comitiali* incipiam ; Is cum in Adultis sit curatu difficillimus, in Pueris tamen haud ægrè levamen recipit. Et quidem, quantum præter alios *Detractionis* Modos, hîc valeat serosi Humoris è Capite, per admotum Occipiti Emplastrum *Vesicatorium*, *Depletio*, ex eo quem suprâ retuli, Casu manifestum est ; qui Fidem facit *Panarolo* affirmanti se *Vesicante Suture Coronali appposito Puerum septennem, Aphonum, stolidum, & Epilepsiæ obnoxium, Sanitati restituisse* (a) ; Et *Celsi* Consilium commendat, suadentis in hujus Morbi

---

(a) *Observ. Medic. Pentecost. 4. Obs. 30.*



Insultibus, Occipitium incidere, & Cucurbitulas admove, Ferroque candente in Occipitio, & infra quâ summa Cervicis Vertebra cum Capite committitur adurere duobus in locis, ut per ea perniciosus Humor evadat (a). Occupavit enim Cerebrum in plerisque hisce Ægritudinibus Malum; quod sicuti in Infantibus Plenitudini & Sanguinis, nondum Exercitiis & Pulmonis Actione subacti, Lentori, ita in ætate provectioribus, Delapsibus ab alto, aut subitis Terroribus ortum sæpissimè debet. Si quid hîc adversus gravissimum Valetudinis genus a Medicamentis quæ Fluidorum Vitium corrigunt Præsidii est, id forsan a Cinnabari, five nativâ, five factitiâ, aut a Radice Valerianæ sylvestris, antequam Caullem edat in pulverem tritæ, fre-

---

(a) Lib. 3. Cap. 23.

quenti usu, jure licebit expectare. Utriusque laudabiles Dotes non semel sum Expertus. De *hujus* imprimis Virtute consulendos velim, tum laudatum modò *Panarolum* (b), tum *Fabium Columnam* (c), eruditum & Herbarum Scientiâ nulli secundum, Authorem.

His ipsis Remediis cedit *Vertigo*. Vomere verò oportet interdum *Ægrum*, & admotis Capiti aut Cervici Emplastris *Epispasticis*, foras ducendus est noxius Humor. Oculorum est hic Morbus, & a tensis ultra modum extremis Arteriis, uti ex Theoriâ *Bellinianâ* manifestum est, trahit plurimùm originem, unde *Lunæ* Circuitibus consentire minimè mirum.

Neq; multùm dispar est *Affectuum Hystericorum* Cura ; Verùm hi

---

(b) *Observ. Pentec.* 1. Obs. 33. (c) *Phytobas.* p. 120.



*Sanguinis Missionem* minimè ferunt. *Alvus* quoque rarò ducenda est. Utilior longe est *Vomit*us, sub tempus præsertim ingruentis Mali : Id, si jam invasit, optimè discutiunt in *Pilulis sumpta Gummi Ammoniacum*, virosum *Castoreum*, *Sal Succini*, & consimilia, quæ Spiritus reficiunt *Pharmaca*. Facienda tamen est in plerisque his Casibus Vitæ consuetudini Muliercularum, & Animi imprimis Affectionibus *Medicina*.

Menstruas Recursus vices ideò servat quandoque *Paralysis*, quia a Capite plerunque incipit hic Morbus ; extra Canales nimirum propulso seroso Latice, qui pro varietate Locorum in quæ depluit, hujus aut illius Partis *Nervorum Resolutionem* parit. Hinc fit, ut *Aplexiam* sæpissime subsequatur hic Affectus, interdum utroque, interdum

dum altero tantum resolutio Corporis Latere. Si quando verò a læsis extrinsecus Nervis, aut natis intus Tumoribus, oritur hujusmodi Imbecillitas, illa certos Circuitus non habet.

Utile hîc erit, post Depletionem redundantis Pituitæ, quam felicissime plerisque in Casibus absolvunt *Alvi Dejectiones*, revertenti Malo occurrere, non solum Medicamentis quæ frigidos & tenaces Humores extenuant, qualia sunt *Radix Raphani rustici, Valerianæ sylvestris, Semen Sinapios*, & siquæ sunt his similia; Sed & crebrâ Corporis in *Aquam frigidissimam Demersione*; si Vires, nimirum, & Ætas id finant; non pariter enim *Senio Confectis* ac *Juvenibus* prodest ista Medicina; quæ cum *Fibrillas* relaxatas *constringat*, & *Urinam* simul *moveat*, utroque modo huic Valetudini est aptissima.

Eâ



Eâ de Causâ, Veteres, uti Author est *Cælius Aurelianus* (a), sic laborantes aut Natare cogeant in Mari, aut decurrentibus ab alto Aquis Partes infirmas aliquandiu subjicere. Ob majus scilicet *Aquæ marinæ* quàm *dulcis Pondus*, & acrius delabentis præcipiti cursu *Rivi* quàm stagnantis *Laticis Frigus*.

Quod ad *Fluoris Menstrui* in Mulieribus Vitia attinet, id seriò perpendendum est, uti plurimùm Causam habet *Nimia Profusio* in *Acrimonia* Sanguinis, ita ortum sæpissime trahere *Menstruorum Retardationem* ab ejusdem *Lentore*. Rariùs verò ob *Humoris paucitatem* supprimitur hic *Fluxus*; adeò singulari Artificio, ad Salutem singularum & Generis Propagationem pariter neces-

---

(a) *Chronic. lib. 2. cap. 1.*

sariæ, Purgationi prospexit & consultuit Sapientissimus rerum Conditor. Quocircà, sicuti in *Immodico Profluvio* habenda est ratio *Temporum*, quibus facillimè ferventem Humorem Canales suos dirumpere expositum est, ut, cùm illa instant, *Missò* quàm longissimè inde ubi prorumpit, *Sanguine*, avertatur *Materiæ Cursus*; ita quoties non provenientia *Menstrua Venæ Incisionem* desiderant, servanda est imprimis *Lindani Cautio*, quam ab *Etmullero* (a) commendatam, explicuit nuper & ingeniosè demonstravit Vir Doctissimus D. *Freind* (b). Porro, Cùm efficacissime *Liquoris Arteriosi Effervescentiam*, quâ distenduntur *Vasa*, reprimat & compescat *Cortex Peruvianus*; maximè juvabit,

---

(a) *Tom. 2. pag. 1017. Edit. ult.*

(b) *Emmenolog. pag. 103.*



fi quando larga nimis timetur *Effusio*, paucis aliquot ante imminentem Accessionem Diebus, creber nobilis istius Medicamenti Usus.

Hæc eadem & in aliis omnibus, quæ certis intervallis recurrunt, *Hæmorrhagiis* tenenda sunt ; petito simul ab iis Pharmacis auxilio quæ dilatatas ultra modum Fibras restringunt & coercent ; inter quæ principem habere locum concretum illum *Succum*, cui falsò *Terræ Japonicæ* impositum est nomen, quàm plurimis Experimentis deprehendi, in illis imprimis quæ ex Pulmone fiunt *Sanguinis Rejectionibus*.

Illud verò ut hic moneam necesse est, Tantam, nimirum, esse in hujusmodi Casibus *Lunæ* Facultatem, ut suppresso interdum qui ab unâ parte fertur sanguine, is ex aliâ, ruptis extremis Canaliculis, exeat. Id accidit *Generoso Juveni*, Cujus  
Morbum

Morbum suprâ (a) retuli ; Cùm enim *Sanguinis* ex Pulmone singulis Mensibus prorumpentis *Sputum* reprefferant laudata modò Medicamenta, patiebatur Is, dictis Temporibus, Ejusdem ex Naribus *Fluxum*, a quo tamen, cùm Malo jam immunis esset princeps Pars, nihil erat metuendum periculi.

Pari quidem ratione contingit hoc, quâ *Quadrupedibus* quæ per *Menstrua* purgantur, *Novâ* plerunque *Lunâ* incidere hoc Profluvium, observatum est. Id *Equabus* imprimis & *Simiis* usu venit ; Et *His* sane adeò constanti ordine, ut *Ægyptii* olim, uti Testis est *Orus Apollo* (b), non solùm pro *Lunâ* *Cynocephalum* pinxerint, ob consensum quendam quoad *Lunæ* cum *Sole* coitum afficitur

---

(a) pag. 46.

(b) *Hieroglyphic. Vid. Gesner. de Simiis.*



*hoc animal, Miffo nimirum Fœminæ è Genitali Vafe Sanguine; ſed & in ſacris Simias nutritæ, ut ex ipſis Conjunctionis Solis & Lunæ tempus cognosci poſſit. Certa itaque ſe produnt in omnibus animantium generibus Imperii Lunaris Indicia, modò conſtans & æquabilis Viſtûs ratio Sideris Virtuti reddat opportunum Corpus.*

Hæc qui intellexerit, quâ neceſſitate Menſtruos etiam interdum ſervet Circuitus Fluor Albus, perſpiciet; imprimis ſi hunc humorem profundant Uterina Vaſa; modò enim ex his, modo ex Glandulis quibus confita Vagina eſt erumpit tetra Colluvies. In illo Caſu, fluentibus Menſibus ſupprimitur Profluvium; In hoc, etiam cùm in Menſtruis eſt Mulier perſtat adhuc, & vel dum in Utero geſtat, excruciat.

Neq;

Neq; dispar admodum est *Ulcerum* ratio; è quibus cùm *Sanies* jugiter exeat, minimè mirum est si largiorem hujus effusionem faciant jam memoratæ Causæ; illis maximè in Partibus, ubi laxior & facile cedens Corporis compages vix ullâ vi contra Canaliculorum distensionem resistit. Unde a *Capitis Vulneribus* gravissimum imminere *Novâ Plenâque Lunâ* Periculum, compertum est.

*Nephriticos Dolores* haud feliciùs quis lenire aggrediatur, quàm detractò primùm è Venis Sanguine. Neque profectò inutile erit illis qui hisce Cruciatibus tentantur, per quæ Intervalla recurrant Paroxyfmi observare, & quo tempore maxime periclitantur, Depletionem Vasorum moliri. Istud enim constat,  
Com-



Compressionem angustorum in Renibus Meatum à minimarum Arteriarum Plenitudine Malum hoc fovere, quam augere semper *Novam Plenamve Lunam*, extra dubium est.

Unde mirari subiit aliquoties, Historiarum Medicarum scriptores totos esse in *Præcipitandis* ( uti loqui amant ) in Tubulos Renales *Arenulis*, cùm ex Incisione Cadaverum didicerim, ut suprâ memoratum est, primam concrementis *Calculi* Materiam esse limpidissimum in *Carunculis* per quas destillat Urina, *Serum*; quod in lapidem durescere posse, Nemini mirum erit, qui *Salium* fluidorum *Vires Attractrices*, & Effecta impediti in angustissimis Canalibus Motûs, cognoverit. Hinc fit, Ut dato subinde *Mercurio Dulci* plus proficiamus in incipiente hoc Morbo, quàm quibusvis *Urinam moventibus* Medicamentis ; Reseratis

tis nimirum a nobili Pharmaco  
tenuium Vasorum Obstructionibus,  
& prohibitâ, quæ has plerunque  
sequitur, Salsorum Humorum Co-  
hæsione.

Cùm non uno modo noceat his  
quos *Spiritus* premit *Difficultas*, *Lu-  
naris* Vis, tum nimirum ob mino-  
rem *Ætheris* in Pulmonem ducti  
portionem, tum ob majorem Vaso-  
rum Sanguinis Dilatationem, omni  
ope tristissimo malo subveniendum  
est, *Sanguinis Missione*, leni *Vomiti-  
one*, *Alvi liquatione*, interdum & *Pur-  
gatione*. Cavendum verò est, maxi-  
mè sub tempora impendentis *Ægri-  
tudinis*, ab illis omnibus quæ San-  
guinis impetum & fervorem conci-  
tant; urget enim in hujusmodi  
*Anxietatibus Febricula*, quam calidis  
five Cibis five Medicamentis incen-  
dere nefas est. Unde *Clamoribus* &  
*Ira-*



*Iracundiâ Anhelis abstinendum esse, monuit Hippocrates (a), & Æstate sæpius & sævius quam Hyeme infestare Asthmatis Accessum, observavit Helmontius (b). Hâc de Causâ, præter ea quæ dixi, multum hîc valent illa Remedia quæ refrigerant simul Humores & Urinam pellunt; qualia sunt, Acetum in quo infusa sit Scillæ Radix, Acidus Nitri aut Salis Ammoniaci Spiritus, Aqua Fumo Sulphuris saturata, Gas Sulphuris vocant Chymicæ Authores; Et quæ his consimilia recensuit plurima laudatus Floyerus.*

Diligentiam Medici & acré Judicium desiderat *Febrium Cura*. Hæc *Depletionibus* fervescente primùm *Sanguine* potissimum peragitur; *Al-*

---

(a) *Epidem. Lib. 6. Sect. 4.*

(b) *Asthm. & Tuss.*

*vi* verò *Purgatione* ideò rarissimis in Casibus utendum est, quoniam turbatur ab Illâ Humorum motus quo Sanguinis Defæcationem molitur Natura. Cùm consistit Morbus, tenui magis victu quàm Medicamentis res agenda est. Inclinatâ verò jam Febre, reficiendæ sunt paulatim laborantis Vires, quo faciliùs per Vias quas monstrat Mali conditio, foras pellatur superans Materia.

Utilia super his Præcepta traderunt Veteres, quorum rationem simul & Usus *Belliniana* Nos docet Theoria. Medicamenta verò quibusvis Morbi Temporibus accommodare, ille demum sciet, qui Remediorum Facultates, & quâ necessitate per has aut illas partes deriventur varii generis Humores, probè intellexerit.

F I N I S.

N



---

---

## COROLLARIUM.

Cùm in primis hisce Schedis expositum sit, quæ *Morborum Recursus* memoratis temporibus faciunt *Cæli Motus*, *Ventis* simul concitandis pares esse; *Horum* verò Vim variam sentire Nos, prout conspiciant cum illis ad agitandum *Aera*, aliæ pariter atq; aliæ Causæ; Operæ pretium erit quantum has Rationes confirmet ipsa Rerum Natura, brevibus saltem indicare.

Incidit ante aliquot Menses, anno proximè elapso, *Die Novembris* xxvi. paulò ante mediam noctem, gravissima *Procella*; stupentibus cunctis & attonitis insolito prorsus & immani

inmani *Ventorum* Furore ; qui ultra sex horas perstitit.

Historiam & Causas omnes mirabilis Eventûs pertexere , mihi neq; opera est neq; otium ; demandam hanc ingeniosissimo Viro D. *Halleio* Provinciam capeßere nolo ; Quantum verò ad rem nostram facit, attingam leviter.

Erat illo tempore *Luna* in *Perigæo*, instabatque simul *Novilunium* ; Utraque de Causâ sursum ferri *Æthera*, & increbrescere *Ventos*, demonstratum est. Et hinc quidem qui subsequebantur *Maris Æstus*, erant immodici & maximè tumentes. Et altius solito, plerisq; saltem in *Locis*, subsedit in *Baroscopio* *Hydrargyrum* ( a ).

---

( a ) *Philosoph. Transact.* N° 289.



Accedebant verò his, dubio procul, ex supra ( *b* ) memoratis aliæ pariter Causæ ; Illas omnes dignoscere Nobis minimè licet ; at Cæli saltem manifesta Conditio quantum ad hanc Calamitatem contulerit, perpendi potest.

Postquam in illis Locis quibus incubuit hæc fera *Ventorum Vis*, per *Æstatem* & *Autumnum* copiâ solito majori deciderant *Pluviæ* ; Mitior & *Calidior* quàm pro more Anni appetebat *Hyems* ; ita ut ad finem usq; *Novembris*, Liquor in *Thermometro*, cujus Gradus *quartus supra octogesimum* Gelu indicat, infra *Centesimum* nunquam subsederit ( *c* ).

Et hinc sanè, collectas fuisse in *Ætheriâ Plagâ*, sursum latis ab *Ar-dore* ex humidâ *Terrâ Anhelitibus*,

---

( *b* ) p. 22.

( *c* ) *Philosoph. Transact.* loc. citat.

*Salium, Sulphurisque* innumerabiles Atomos, conjecturam facimus ; quibus variè coeuntibus & agitatibus, accessit huc & illuc effluenti jam *Aeri* exitialis Impetus.

Fidem dictis faciunt, quibus crebris, sub tempus funesti Turbinis, micuit *Æther, Fulgura* ; & *salso Sapore*, die insequente, Linguam ferientia, etiam in Campis longè a Mari remotis, Arborum *Virgulta & Gramina* ; ut degustatum Pabulum refugerint Pecudes.

Sed hæc fusiùs persequi minimè vacat. Istud potiùs meminisse juvat ; Contigisse etiam Patrum nostrorum Memoriâ immoderatam *Tempestatem*, huic fortasse jam dictæ minimè parem, at cujus tamen miram Violentiam referunt illorum Temporum Annales. Sæviit illa, Nocte quæ Mortem impii Perduellis



lis *Cromwellii* infecuta est, die 3. *Sep-tembris*, Anno 1658.

*Aeris* per illius Anni decursum, Statum & Morem nullæ, quod quidem sciam, docent *Ephemerides*. Istud verò observâsse, pertinet ad propositum ; *Plenam*, nimirum, *Lunam*, sub accessum *Æquinoctii Autumnalis*, apportâsse hanc *Ventorum* Rabiem ; ut mirum non sit magnis Motibus opportunam fuisse *Cæli* regionem.

Pari necessitate, in illis Regionibus quas crebra premunt *Diluvia*, iis plerunq; Temporibus fieri *Inundationes* observatum est, quibus Viribus maximis pollet *Luna* ; ut non immeritò horum Malorum præcipuam Causam in Tumentes immodicè *Maris Æstus*, & infeliciter simul conjunctam horum aut illorum *Siderum*

*derum Facultatem attractricem, conje-*  
*cerit Eruditus Baccius (a).*

Has & confimiles habent a *Naturâ* *Causas Ventorum Turbines* ac *Tempestates*; Quantum enim ad *Quæstionem de Divinâ Potentiâ* spectat, num *Supremi Numinis Irâ* extra *Rerum Ordinem*, eveniant hujusmodi *Calamitates*, differere non est nostrum; Religionis Vinculis animos hominum absolvere minime conabor; Quanquam enim certis *Legibus* constare & moveri sciam singulas immensæ hujus *Machinæ* *Partes*, & eandem *Fabricæ Dispositionem* quæ *Universæ Moli* commodissima est, *Paucis* quandoq; in *Locis* inferre debere *Clades* & *Damna*; *Suum tamen Rerum Conditori Opt. Max.* in omnia quæ

---

(a) *Del Tevere*, lib. 3. p. 228.



perfecit jure cedendum est Imperium. Et erat fortassis *Divinæ Rationi* consentaneum illo Artificio Mundum instruere, quo caderent interdum Noxæ & Detrimenta in Homines, quos *Fulminibus* terrere, & *Prodigiorum Tempestatumque* metu in Officio continere, necesse habebat.

---

*F I N I S.*

---







